


NZAMBE AZALI

MOLIMBOLI NA YE MOKO

 Tata na biso na Likolo, Liloba moko kouta na Yo ezali na motuya koleka nyonso oyo bato bakoki kosala to koloba na ntango nyonso, mpo ete bato bazali kozela ete bamona Yo. Pe totondi Yo mpo ete bato mosusu bazali kozela na mitema lukulu, bazali kozela ete likambo moko esalema. Pe ntango bato bazali na mposa ya eloko moko boye, wana bozindo ezali kobenga Bozindo, esengeli Bozindo moko ezala mpo na koyanola mbela yango. Yango nde ntina toyeli awa na mpokwa oyo, mpamba te ezalaki na mitema ya batei oyo, pe ya bato, mpo na kosangisa biso pe kosenga Yo ngolu pe mapamboli, na kondimaka ete Okobikisa babeli pe Okobikisa baoyo babungi, pe Okomonisa Liloba na Yo polele.

2 Pe tozali kobondela, Tata na Likolo, ete Opesa biso yango wana tozali kolikia epai na Yo na komikitisa, mpokwa na mpokwa. Tika ete Molimo Mosantu e—esopana mpenza, pe tika ete bato nyonso bazipama miso na makambo mosusu zongazonga na bango bamona bebele Nzambe. Tika ete bato babelela na mongongo makasi, wana ezali bango na mposa ya Nzambe, kino ete kolamuka esalema na ekolo oyo mobimba pe lingomba moko na moko etonda meke na bato, basumuki baluka Nzambe na mai na miso ete Ayokela bango mawa, pe—pe Molimo Mosantu abikisa babeli, atambuisa batengumi, asekwise bakufi, pe apesa makambo oyo elakamaki kati na Liloba na Yo.

3 Yaka, Nkolo Yesu, pe kokisa elaka na Yo. Yaka epai na biso na mpokwa oyo. Tondimi ete Ozali motindo moko lobi, lelo, pe libela, ete bilaka na Yo ekoki kokweya te. Likolo na nse ekoleka kasi Liloba na Yo ekoleka te. Tika ete lisosoli na biso efungwama. Tika ete Molimo Mosantu aya kobongisa mabele. Tika ete lisosoli na biso efungwama na oyo etali Molimo pe nguya na Nzambe na mpokwa oyo, ete Akoka komonisa polele Maloba na Ye ya elaka na nzela na biso. Mpamba te tosengi yango na Nkombo na Yesu. Amen.

4 Sikawa, na mpokwa oyo, mpo na bino baoyo bozali kolanda botangi, tokamata Biblia na Mokanda ya Mibale na Petelo, pe tobanda na molongo ya 15, bebele mpo na kozua nzela ya koloba likolo na Makomi mpo na mwa ntango moke.

Nakomeka na etingia ete ntango nyonso nsima na kolongwa na ngai bokokoka kokanisa makambo oyo lisusu.

Zambi wana eyebisaki biso bino mpo na nguya na komonana na Nkolo na biso Yesu Klisto, tobilaki masese, na miango na mayele te, kasi lokola esili biso komona nkembo na ye monene na miso na biso mpenza.

⁵ Nasepeli na yango, “komona na miso na biso mpenza.” Lisese moko boye te. Tomoni na miso na biso mpenza makambo oyo tozali koloba.

Mpo ete azui lokumu pe nkembo na maboko na Nzambe Tata pe mongongo ebimi mpo na ye na nkembo monene monene ete, Oyo Mwana na ngai molingami na ngai; nakosepelaka na ye mingi.

Biso toyokaki mongongo yango kobima na likolo, wana ezalaki biso na ye kuna na ngomba na bulee.

Tozali kolendisala liloba lisakolami na makasi na koleka.

Bokoki kosala malamumu kotia mitema na bino na yango, lokola na mwinda oyo ezali kopela na . . . esika na molili mabe, kino ekotana ntongo pe monzoto na ntongo ekobima na mitema na bino.

Boyeba liboso na nyonso ete moko te na bisakweli na makomi ebimaki na makanisi na bato mpenza.

Mpo esakweli moko te ebimaki kalakala na mokano na moto, kasi moto auti na Nzambe balobi wana ezalaki bango kopusama na Molimo Mosantu.

⁶ Tika ete Nkolo abakisa mapamboli na Ye na botangi ya Liloba na Ye. Sikawa nakokamata oyo lokola motó na liteya: *Nzambe Azali Molimboli Na Ye moko.*

⁷ Tozali kobika na ntango moko ya mobulu. Tozali kobika na ntango oyo basi pe mibali bazali mpenza koyeba te eloko nini basala. Makambo nyonso, e—ezali komonana lokola ezali kati na yiki-yiki. Makambo nyonso, ezali komonana lokola ete banzela ya kolanda ezali mingi mpenza. Kosala bongo, ezali Satana.

⁸ Kasi, Nzambe akoki te kosambisa bato na bosembo, na ndenge elongobani, bobele soki emekeli moko ezali oyo Asengeli kosambisa bango na yango. Pe Biblia elobi ete Akosambisa bato nyonso na nzela na Yesu Klisto, pe Yesu Klisto azali Liloba. Na mokanda na Yoane, mokapo ya 1, elobami:

Na ebandeli Liloba azalaki, pe Liloba azalaki mboka na Nzambe, Liloba azalaki pe Nzambe.

Liloba akomi mosuni pe afandi kati na biso, . . .

⁹ Sikawa, nyonso oyo tozali lelo ezali kotalisama ya makoki na Ye. Kati na Nzambe . . . Yambo Azalaki kutu ata Nzambe te, Nzambe, tokokaki bobele kobenga Ye “Oyo na Seko.” Azalaki Nzambe te, mpamba te liloba oyo (liloba oyo na ngelesa) *Nzambe* elimbolami “eloko ya kokumbamela” kasi eloko moko ezalaki

te mpo na kokumbamela Ye. Boye Azalaki Oyo na Seko, Liziba na—na yambo ya mayele nyonso. Pe kati na Liziba oyo ya mayele nyonso naino atómi moko te ezalaki, to molekíli, to eloko moko te, to pole epai moko te, monzoto te, sanza te, eloko mosusu te. Nzambe, biso toyebi ete azali Nzambe, Molimo monene oyo azalaki Seko (abanda soki moke te, akosuka soki moke te), Azalaki. Pe kati na Ye, makoki ezaláká: ezalaka makoki ya kozala Nzambe, na nsima makoki na Ye ya kozala Tata, makoki ya kozala Mwana, makoki ya kozala Mobikisi, makoki ya kozala Mobikisi na nzoto. Makoki oyo nyonso ezaláká kati na Ye. Pe sikawa Ye. . . Makambo oyo ezali kofungwama uta ntango yango ezali bobele makoki na Ye oyo ezali komonisama.

¹⁰ Oyo nalingi koloba, *makoki* ezalaki nde “makanisi” na Ye. Pe li—*liloba* ezali nde “likanisi oyo elobami.” Pe na ntango wana ezalaki kati na makanisi na Ye. Pe ntango Alobaki: “Tika ete eloko boye ezala,” pe ezalaki. “Tika ete eloko boye ezala,” pe ezalaki.

¹¹ Pe sikawa, bomikanisela, bino Baklisto bozalaki makanisi na Ye liboso ete mokili ezala. Pe bozali bomonisami ya makanisi na Ye. Liboso ete ata mokili ezala, bino bozaláká kati na Klisto, (amen) kati na Nzambe, na ebandeli. Boye, yango esali ete bozali bato na Ye, bomoni. Pe nyonso wana ezali nde Nzambe Ye moko, komibimisa Ye moko polele ete Akoka kosimbama, komonana pe—pe bongo na bongo. Pe yango nde Nzambe azali, nyonso wana.

¹² Na nsima bato balobi: “Ndimbola. . .” Eleki ntango molai te nazalaki koteya awa kati na Liyangani moko, mobali moko alobi na ngai, alobi: “Ndeko Branham, ezali na ndimbola ya mabe. Ozali kolimbola Yango malamau te.”

¹³ Sikawa, toyokaka. . . Bakendeke epai na ba-Metodiste, pe balobaka: “Ba-Batiste balimbolaka malamau te.” Ba-Batiste balobaka: “Ba-Pantekotiste balimbolaka malamau te.” Ba-Pantekotiste balobaka: “Ba-Initére balimbolaka malamau te.” Ba-Initére balobaka: “Ba-Asemblé balimbolaka malamau te.” Pe moko na moko alobaka ete oyo mosusu alimbolaka malamau te.

¹⁴ Nzambe azali Molimboli na Ye moko! Asengeli na moto moko te mpo na kolimbolela Ye. Asalaka mosala ya kolimbola Ye moko. Moto yango nani oyo akoki kolimbola Nzambe? Nzambe azali Molimboli na Ye moko.

¹⁵ Sikawa, ndenge Petelo azali koloba awa, tomoni ete na ebandeli ntango Nzambe alobaki: “Tika ete pole ezala,” pe pole ezalaki, yango nde ndimbola na yango. Ntango Nzambe alobi likambo pe ekokisami, na ntango wana, yango nde ndimbola ya Nzambe kotalisa ete Liloba na Ye ezali solo. Bomoni? Ntango Alobaki: “Tika ete pole ezala,” yango ezalaki yambo kati na makanisi na Ye liboso ete eloko lokola pole ezala. Ntango Alobaki: “Tika ete pole ezala,” pole epunzwaki na likolo,

yango nde ndimbola na yango. Moto te asengeli kolimbola yango, mpamba te Nzambe alobaki bongo pe esalemaki. Ntango Nzambe alobi pe emonisami polele, yango nde ndimbola ya Liloba na Ye. Mpo na nini bato bazali kokoka komona yango te? Mpo na nini bato bazali komona yango te?

¹⁶ Ntango Nzambe apesi elaka, pe Nzambe alobi. . . Na—na ebandeli, na Genese, Apesaki eteni ya Liloba na Ye na eleko moko na moko, ndenge Ezali koya banda na ebandeli kino na suka. Pe, kati na bileko oyo nyonso banda na ebandeli, bato ya mangomba babulunganisi makambo oyo nyonso na nzela na mimeseno, pe bongo na bongo, pe Nzambe atindaka basakoli ntango nyonso na mosala, kati na Kondimana na Kala pe na Sika mobimba! Pe Liloba na Nkolo eyaka epai na mosakoli. Pe Esalemaka ndenge nini? Emonisaka polele Liloba na Nzambe. Komonisama polele ya Nzambe, yango nde ezali kotalisa soki elongobani to te. Moto moko te asengeli kolimbola Yango, Liloba emilimbolaka Yango moko. Nzambe alakaki yango pe yango oyo ezali kokokisama!

¹⁷ Koloba likambo mosusu na ntina na Yango ekosala bolamu nini? Mosumuki nani yango oyo akomeka koloba (ntango Nzambe apesaki elaka pe Nzambe akokisi yango) ete ndimbola yango ezali mabe? Oyo wana ezali Nzambe Ye moko azali kopesa ndimbola na Ye moko, kolimbola. Asengeli na moto te mpo na kolimbola Ye, Amilimbolaka Ye moko na nzela na komonisa polele oyo Alakaki ete Akosala.

¹⁸ Oo, soki Lingomba ekokaki bobele komona yango pe komona bilaka oyo epesami mpo na eleko moko na moko! Kati na bileko nyonso mosusu, Nzambe azalaki kotinda na mosala (ata kati na bileko nsambo na lingomba) pe azalaki komonisa polele nyonso oyo Alakaki kosala. Na nyonso, ata eloko moko oyo ezangi kosalema ezali te. Bongo mpenza! Oyo Alobaki ete Akosala, yango nde Asalaki.

¹⁹ Mpamba te ntango Nzambe alobaki, kuna kati na Yisaya, Alobaki: “Mongondo akokumba zemi,” pe akumbaki zemi. Sikawa, nani—nani akoki kolimbola yango? Nzambe nde apesaki ndimbola. Alobaki: “Mongondo akokumba zemi,” pe akumbaki zemi. Sikawa, nini yango ozali ko . . . okoki te . . . Likambo moko te ekoki kolobama na ntina na yango, mpamba te Nzambe alobaki ete akokumba zemi pe akumbaki yango. Kasi lingomba ekufaki mpenza miso koleka na ntango wana na lolenge ete emonaki yango te. Bomoni, bazalaki na likanisi na bango moko na ntina na yango. Ekesanaki mingi—mingi na oyo bazalaki kozela.

²⁰ Petelo awa azongisaki biso kuna, alobi: “Nzambe amonisaki Klisto polele na nzela na Liloba na Ye, Alobaki: ‘Oyo azali Mwana na Ngai na bolingo.’” Bandimi oyo bazalaki wana. Pe Klisto azalaki bomonisami polele ya Nzambe. Azalaki ntango

nyonso komonisa Klisto na nzela na Liloba na Ye, mpamba te Klisto azali Liloba. Amimonisaka polele ntango nyonso.

²¹ Ntango Alobaki . . . Na mikolo na Nowa, Klisto azaláká kati na Nowa. Bondimi yango? Nowa alobaki: “Mbula elingi konoka. Mbula moko ekonoka, mabele ekobebisama.” Mbula enokaki. Yango esengelaki na ndimbola moko te. Mbula enokaki mpamba te Nzambe, kati na Nowa, alobaki: “Mbula elingi konoka.” Azalaki mosakoli, pe elembo na yango ezalaki ete oyo ye alobaki ekokisamaki. Boye basengeli kolimbola yango te.

²² Bamosusu kati na bango, nzinga-nzinga, bakokaki koloba: “Mobali oyo ayebi eloko azali koloba te.”

²³ Kasi Nzambe asiláká kolaka: “Soko mosakoli to moto na molimo azali kati na bino, pe oyo alobi ekokisami, na bongo boyoka yango.” Ezali bongo, mpo ete ezali ya solo. Yambo esengeli kozala na boyokani na Liloba. Pe Nowa azalaki na boyokani na Liloba. Ntango asakolaki ete mbula elingi konoka, mbula pe enokaki. Yango esengelaki na ndimbola ata moke te, mpo ete ekokisamaki mpenza bongo.

²⁴ Yisaya alobaki: “Mongondo akokumba zemi,” pe akumbaki zemi. Kasi, ezalaki mpenza libanda na momeseno. Mpamba te, bomoni, elekaki mibu nkama na nkama liboso ete mongondo oyo akumba zemi.

²⁵ Ezalaki mpenza libanda na momeseno na lolenge ete mobali moko malamau na nkombo Yosefu, mobali na ye, “Azalaki moto na boyengebene pe alingaki koyokisa ye soni na miso ya bato te. . .” Mobali malamau yango na mikolo oyo wana, ndenge azalaki mpenza mpo na Yosefu ntango oyo andimanaki, abandamaki na Malia.

²⁶ Ye mwasi abandamaki. Na mikolo wana, kobuka yango, ezalaki mpenza ndenge moko lokola kosala ekobo. Pe, na ntembe te, mpo na Yosefu, emonanaki lokola nde Malia azalaki komeka kosalela ye lokola etutu, to kokomisa ye nguba mpo na kozipa mabe na ye, mpamba te, tala azwamaki na zemi, naino abalaki te, abandamaki kaka. Na mayele mabe ya boye, bazalaki kobomama na mabanga; esengelaki kozala bongo, yengebene na mobeko.

²⁷ Pe Yosefu, mobali na ye, azalaki moto na boyengebene, moto na boyengebene mpenza. Andimelaki Nzambe. Pe ntango oyo mwasi azalaki kotala ye na miso na ye minene, ya bolingo pe ya bopolo, pe koloba: “Yosefu, Gabriel mokóló na banje amonani na ngai pe alobi na ngai ete nakokumba zemi, kozanga koyebana na mobali.”

²⁸ Bongo, soki Yosefu azongaka bobele kotala kati na Makomi, mosakoli alobaki ete alingaki kokumba zemi! Ezalaki bobele Nzambe kolimbola Liloba na Ye Moko! Bomoni? Kasi ezalaki mpenza libanda mingi na momeseno.

29 Yango nde mindondo na bileko nyonso. Liloba na Nzambe ezali mopaya mpo na bato; Ezali mpenza libanda na momeseno. Nzambe asalaka ntango nyonso likambo oyo ezali libanda na momeseno. Esika nini Nzambe azali, ezalaka libanda na momeseno. Ezali kotelemela mabongisi ya mokili, mpamba te bango babongisá makambo na ndenge oyo bakanisi ete esengeli kozala. Kasi Nzambe ayaka kosala likambo oyo ezali libanda na momeseno.

30 “Ndenge nini mongondo oyo akokaki kokumba zemi?” Mobali azalaki sembo, alukaki Nzambe na ntina na yango.

31 Pe na nsima Nzambe asololaki na ye na liloto, pe alobaki: “Yosefu, mwana na Dawidi, banga kokamata Malia mwana na yo te, zambi yango esili koya na ye ezali mpo na Molimo Mosantu. Nzambe asili kozipya ye. Oyo nde ekokisi likambo yango.”

32 Bosili komona ndenge Nzambe asalaki kuna epai na Yosefu? Na nzela ya mibale, na nzela ya liloto. Sikawa, toyebi ete ndoto ezali, tondimaka ndoto. Nandimaka ndoto. Ezalaki . . . Nzambe asalaka na bato ntango nyonso kati na ndoto. Kasi ndoto ezali makambo ya nsima, bomoni, ekoki kozala solo to lokuta soki elimbolami te. Kasi ye asengelaki na ndimbola ata moko te. Ezalaki Nzambe Ye moko kosolola mbala moko na Yosefu, mpo ete kati na mboka na mikolo yango, mosakoli azalaki te mpo na kolimbola. Mosakoli azalaki kuna te kati na mibu nkama minei. Boye nzela ya mibale oyo eleki malamumu oyo Nzambe asalelaki mpo na bolamu, bolamu ya Mwana na Ye moko, ezalaki ete asolola na Yosefu na nzela na liloto pe kozanga ndimbola. Alobaki ete: “Mwasi azali na elonga. Mwana na bulee oyo azuami na kati na ye Azali Mwana na Nzambe.” Esengelaki na ndimbola ata moko te.

33 Nzambe asalaka mosala ya kolimbola Ye moko mpo na mitema ya sembo, ya alima, mpo na mibali pe basi oyo bazali kotia miso na—na likambo oyo ezali ya kobombama, soki bozali sembo pe alima pe soki bokondima, Nzambe azali na nzela moko mpo na kolimbolela bino yango. Ya liboso, luka oyeba soki ezali elaka. Soki Yosefu azongaka bobele pe atangwaka na mimeseno ya kala pe azongaka na Biblia, pe aluka koyeba, Yisaya alobaki mwasi alingaki kokumba zemi.

34 Makambo oyo elobamaki, mbotama na Ye, pe nyonso na ntina na yango elobamaki na Makomi, “na basakoli ya bulee,” ndenge Petelo alobaki. Pe moto moko te azali na makoki ya kobakisa ata ndimbola nini ya ye moko likolo na yango. Ezali mpenza oyo Nzambe alobaki ete ekosalema. Ye azalaki bomonisami ya Liloba na Nzambe oyo elakamaki mpo na mokolo wana. Nzambe alobaki yango, boye yango wana. Yango nde ekataki likambo.

35 Yesu alobaki . . . Wana ezalaki Ye na mokili, ntango bazalaki kokoka kososola mosala na Ye te, elekaki monene mingi,

bikamwa minene mingi (bakokaki te), ya kokamwisa mpenza, nalingaki náloba. Bazalaki kososola Ye te. Azalaki koloba: “Bozali kolukaluka kati na Makomi!” (Nabanzi ete nazali koboma bino kuna matoi te, ndenge nazali koganga kati na yango.) “Bozali kolukaluka kati na Makomi, mpo ete bobanzi ete na Yango bokozua Bomoi na Seko, pe ezali Yango mpenza nde etatoli mpo na Ngai.” Bomoni? “Ezali Yango nde ezali kotalisa bino Nani Ngai nazali.”

³⁶ Bomoni, Nzambe apesa eteni ya Liloba. Eleko oyo wana esengelaki kozala mokolo ya bomonisami ya Nzambe, Nzambe (Emanuele) elongo na biso, “Nkombo na Ye akobiangama ete, Oyo na kokamwa, Mosungi, Nkolo na Kimia, Nzambe na Nguya, Tata na seko. Pe Nkombo na Ye akobiangama *Emanuele*, ‘Nzambe elongo na biso.’” Nzambe azalaki kati na Dawidi. Nzambe azalaki kati na Mose. Nzambe! Ezali Nzambe ntango nyonso, oyo azalaki komimonisa Ye moko polele mpo na eleko wana. Kasi na eleko oyo, “Mongondo akokumba zemi, akobota Mwana mobali, pe Akozala Nzambe elongo na biso.”

³⁷ Yango nde ntina oyo babakaki Ye na ekulusu, mpo Amikomisasi Nzambe, pe lisusu mpo Abukaki mobeko ya Sabata. Azalaki—Azalaki Nzambe oyo azalaki likolo na Sabata, pe Azalaki Nzambe. Pe Azalaki bobele moto lokola bato nyonso te to mosakoli lokola basakoli nyonso te, (atako Azalaki Moto lokola bato nyonso pe Mosakoli lokola basakoli nyonso), kasi Ye azalaki Nzambe-Mosakoli. Pe Azalaki bokokisasi ya Liloba, mpenza-mpenza oyo Nzambe alobáká ete Akosala. Alobaki: “Nani kati na bino akokweisa Ngai na ntina na lisumu? Bozali kolukaluka kati na Makomi! Mpo ete na yango bobanzi ete bokozua Bomoi na Seko. Pe ezali yango mpenza etatoli mpo na Ngai.” Kasi na mimeseno na bango, bazalaki kobika kati na mwa bongengi ya eleko oyo eleka.

³⁸ Ndenge nazalaki koteya esili koleka mwa bapóso likolo na: “*Kobika kati na mwa bongengi.*” Mwa bongengi ezali kaka lokola “elili ya lokuta” ntango eloko moko esali paii na moi, kasi ezali ya lokuta. Pe mwa bongengi nyonso ya eleko eleka ezali ngelingeli ya lokuta. Ntango nyonso bato bazali kotambola kati na likambo oyo esalema esili koleka mibu. Bato na Luther bazali kotambola kati na mwa bongengi ya Luther. Pole ya moi na ntango ya Luther ezalaki malamumu na mikolo na ye; oyo ya Wesley ezalaki malamumu na mikolo na ye; oyo ya bato na Pantekote ezalaki malamumu na mikolo na bango. Tozali kokoba kobuta ebuteli, tozali kobika kati na eleko mosusu! Tozali kokoba kokende liboso, tokoki kokoba kotala na nsima te.

³⁹ Na ntango oyo tomifandisi kati na makambo, tokanisaka ete tosali nyonso, tozipi mimeseno na biso nyonso; pe oyo wana ezalaki malamumu mingi na mikolo wana, kasi nde tozali kokende liboso! Bolukaluka kati na Makomi mpo bomona nini

oyo elakami mpo na lelo, na nsima tokoyeba epai wapi tokomi, na nsima nde tokoki koyeba epai wapi tozali.

⁴⁰ Luther, bokokaki kotala kati na Makomi pe komona kati na—kati na eleko yango ya Salade, bokoki komona mpenza-mpenza oyo elakamaki. Botala lolenge ya mobuti mpunda oyo abimaki, botala eloko nini ekendeki kokutana na ye, mpenza-mpenza, “bwanya ya moto,” bobongisami. Botala Wesley malamumu, pe bamosusu. Ndenge ezalaki koya kino na eleko na Pantekote, pe ekatisaki na eleko yango, botala malamumu ndenge etamboli. Botala kati na Makomi mpo bomona epai wapi tokomi. Yango nde ntina Yesu alobaki: “Bozali kolukaluka kati na Makomi!”

⁴¹ Botala epai wapi tokomi! Nandimi ete tokomi na ntango na Boyei ya Mwana na Nzambe sikawa. Nandimi ete tokomi na eleko ya—na ngonga mpenza oyo Akoki komonana ata na ntango nini. Nandimi ete Makomi elobi yango, ete tokomi na bangamba ya suka ya lisolo ya mokili oyo. Nazali komona ndenge makambo ezali kozwa lolenge. Nazali komona Lisanga oyo ya Mangomba kokamba mangomba nyonso mpo na kokota kati na yango, kati na elembo na nyama. Pe nazali komona Bokonzi ya Baroma pe oyo yango ezali kosala, pe bango nyonso oyo batikali. Nazali komona bango kosangana, kokangela Pole ekuke, kokangela Nsanga Malamumu nzela. Bato nyonso bakosengela kozala na lisanga yango pe kotambola kati na bapole na bango, soki te bakotambola ata moke te. Bomoni, tokomi na ntango ya suka. Eloko ata moko te etikali mpo na biso soko bobele kokangama na Nzambe pe kondima Liloba na Ye. Liloba ezalaka ntango nyonso na elonga.

⁴² Kati na eleko na lingomba na Laodikia, yango nde ezalaki eleko na lingomba bobele moko, kati na yango nyonso, oyo Klisto atiamaki libanda na lingomba. Azalaki libanda, azalaki kobeta ekuke. Likambo nini esalemi? Lisanga yango ya Mangomba nde ekobwaka Ye libanda. Biblia elobi ete Asengelaki kozala libanda, pe Azali libanda. Ekangeli nini ekuke? Liloba. Pe Ye azali Liloba, Azalaka ntango nyonso Liloba, pe Azali Liloba kino na mpokwa oyo! Azali Liloba.

⁴³ Biblia elobi: “Liloba ezali na mopotu, na nguya koleka mipanga nyonso mipeli bipai mibale,” Baebele, mokapo na 4, “ezali komeka makanisi pe mikano na motema.” Liloba nde! Basengelaki koyeba Nani Ye azalaki na ntango Yesu alobaki bongo na mokolo wana.

⁴⁴ Botala malamumu oyo Ye asalaki. Mokolo moko, Atelemaki kuna, na ebandeli mpenza ya mosala na Ye. Mobali moko ayaki epai na Ye, nkombo na ye Simona, Simona Petelo. Pe ntango Petelo atalaki Ye pe—pe amonaki Ye, Yesu alobaki na ye: “Nkombo na yo Simona pe ozali mwana na Yona.” (Asengelaki koyeba ete Mose alobáká: “Yawe Nzambe na yo akotelemisela yo Mosakoli lokola ngai, esengeli boyoka Ye.”) Pe tala, Moto moko

oyo Amóná ye ata mbala moko te kati na bomoi na ye, alobaki: “Nkombo na yo Simona pe ozali mwana na Yona.” Boye, ayebaki kaka na ntango yango ete ekokaki kozala eloko mosusu te. . . Bazwáká lisusu mosakoli te kati na mibu nkama na nkama, pe tala, Mobali moko azalaki koyebisa ye nani ye azalaki. Bokamwa te soki ayambaki yango!

45 Filipo, na ntango yango, akendeki pe—pe akutaki Natanaele na nse na nzete, pe azongaki na ye epai na Yesu. Yesu alobaki: “Tala mo-Yisalaele na solo, bokosi ezali kati na ye te.”

Alobaki: “Labi, Oyebi ngai boni?”

46 Alobaki: “Liboso naino Filipo abiangi yo te, naino ozalaki na nse na nzete, Namonaki yo.”

47 Alobaki: “Labi, Yo Mwana na Nzambe! Yo Mokonzi na Yisalaele.” Ayebaki ete ezalaki bongo! Nini? Esengelaki na ndimbola moko te, Yawe nde alobaki yango!

48 Tala, baoyo bandimaki yango te bazalaki wana. Balobaki: “Mobali oyo azali Bezezebula. Azali na—Azali na mwa mayele mabe oyo Ye azali kosalela. Ye—Ye azali moto na soloka, to moto moko boye.”

49 Yesu atalaki bango, pe alobaki: “Bongo, soki bolobi mabe kotelemela Mwana na moto, ekolimbisamela bino. Kasi ekoya Molimo Mosantu, kosala likambo yango moko, koloba mabe kotelemela Yango, ekolimbisamela bino soko moke te, to na mokili oyo, to na mokili ekoya.” Azalaki kosakola mpo na mokolo na biso, mikolo oyo biso tokosengela komona. Mpamba te Azali lolenge moko lobi, lelo, pe libela na Libela.

Bomikanisela, Yesu Klisto nde azalaki kati na Mose.

50 Yesu Klisto nde azalaki kati na Dawidi. Ntango Dawidi, mwana na . . . Dawidi abutaki likolo na ngomba, lokola mokonzi oyo aboyami, pe alelaki na ntina na Yelusaleme, oyo wana ezalaki eloko mosusu te bobele Klisto kati na ye. Mpamba te nsima na mibu pene na nkama mwambe, Mwana na Dawidi atelemaki likolo na Ngomba na Bilaya pe abwakaki miso likolo na Yelusaleme pe alelaki, pe alobaki: “Yelusaleme, Yelusaleme, mbala boni Nalingaki kozipa bino mapapu lokola nsoso akozipaka bana na ye, nde bolingaki te!”

51 Wana ezaláká Yosefu kati na boloko, ezalaki nde Yesu. Ntango atekamaki pene na palata ntuku misato ya mbongo, ezaláká nde Yesu. Ntango oyo bakomisaki ye mosali epai na Potifalo, ezaláká nde Yesu. Ntango afándáká na loboko ya mobali ya Fáló. Pe ntango azalaki kotelema, bato nyonso. . . kelelo ezalaki koyula, pe moto nyonso asengelaki kogumba mabolongo, ezaláká Yesu. Moto moko te akokaki koya epai na Fáló soko na—na nzela na Yosefu te; moto moko te akoki koleka kino epai na Nzambe, soko na nzela na Yesu te. Ezalaki nde

Yesu, Liloba oyo esakolamaki ezalaki bongo kokokisama, oyo elobámáká na bilili pe na bitaliseli.

⁵² Ntango Yesu azalaki awa na mokili, Asalaki bobele likambo oyo basakoli basáláká, yango wana bayebaki ete Ye azalaki bomonisami polele ya Liloba na Nzambe. Esengelaki na ndimbola te.

⁵³ Ntango Natanaele amonaki yango, afukamaki, alobaki: “Yo Mokonzi na Yisalaele, Mwana na Nzambe, Mokonzi na Yisalaele. Toyebi Yo, moto moko te akokoka kosala oyo.”

⁵⁴ Nikodeme ayaki na butu, koloba likambo yango moko na ntina na Bafalisai. Kasi, bomoni, bakangamaki makasi na Lisanga na bango ya Mangomba na lolenge ete bakokaki koyamba Yango te. Alobaki polele oyo bango bazalaki koloba, alobaki: “Labi, biso. . .” “Biso” nde banani? Lisanga na bango! “Toyebi ete Oyei molakisi uta na Nzambe, mpo ete moto akoyeba te kosala bilembo nyonso bikosalaka Yo soki Nzambe azali na ye elongo te.” Bayebaki yango, bayebaki ete ezalaki bongo, kasi nde bakangamaki na yango makasi.

⁵⁵ Pe, kati na mibu ntuku minei oyo eleki, Nzambe aningisi ekólo oyo na nzela na libatisi na Molimo Mosantu, kasi basi na mibali bazali kaka libanda na Yango mpamba te bakangami kati na likambo moko ya motindo wana, wana ezali bango kobika kati na mwa bongengi oyo ya mokolo eleká. Likambo nini? Moto nyonso alingi kozala Metodiste, Batiste, Presbiterien, Luterien, to mosusu. Bomoni, ezali mwa bongengi.

⁵⁶ Bazalaki kobika kati na mwa bongengi ya mikolo na Mose. Alobaki nini? Alobaki. . . Balobaki: “Tozali bayekoli na Mose.”

⁵⁷ Alobaki: “Soki bóyébaka Mose, mbele bolingaki koyeba Ngai. Mose akomákí na ntina na Ngai!”

⁵⁸ Soki bóyébaka Luther, mbele boyebi eleko oyo! Soki bóyébaka Metodiste, bolingaki koyeba eleko oyo! Mpamba te Klisto akomákí na ntina na eleko oyo! Maloba oyo ezali kokokisama esengeli kokokisama na eleko oyo. Esengeli na moto moko te mpo na kolimbola Yango, Nzambe asalaka mosala ya kolimbola Ye moko. Nzambe alimbolaka mpo na Ye moko, mpo ete bobele Ye moko nde akoki kolimbola Yango. Bilaka na Nzambe etatolaka ntango nyonso oyo Alobaki, pe yango nde ndimbola.

⁵⁹ Sikawa, Yesu, (mpo na kowela ngonga), Yesu alobaki, na Buku ya Yoane, mokapo ya 14, eteni ya 12: “Ye oyo akondima Ngai, misala mizali Ngai kosala, akosala yango pe lokola.” Alobaki yango? Ezali boye. Yango esengeli na ndimbola ata moke te. Ntango moto moko azali kosala mosala yango, ezali nde Nzambe. Na ntembe te!

⁶⁰ Alobaki lisusu kuna na kati: “Pelamoko na mikolo na Lota, ekozala lokola makambo oyo na mokolo ekoya Mwana na moto.”

Yesu nde alobaki yango. Alobaki yango? Na ntembe te, Alobaki yango! Yango esengeli na ndimbola ata moke te.

Bakoloba: “Ee, yango elingaki koloba . . .”

⁶¹ Elingaki koloba mpenza-mpenza bobele oyo Ye alobaki! “Pelamoko na mikolo na Lota, ekozala lokola makambo oyo na mokolo ekoya Mwana na moto.” Na mikolo na Lota ezalaki ndenge nini? Tozonga naino nsima mwa moke mpo tomona nini bazalaki kosala.

⁶² Lolenge ya bato ezalaki misato na mikolo na Lota: mondimi, mondimi ya nkombo, pe mozangi-kondima. Yango ezali kati na masangá nyonso, likambo yango moko.

Tomoni ete bato na Sodoma bazalaki bazangi-kondima.

Lota azalaki mondimi ya nkombo.

⁶³ Abraham azalaki mondimi. Kondimana etatolamaki nde epai na ye. Ye moto azalaki kozela mwana na elaka. Ye moto azalaki kozela yango. Amen. (Nazali koloba “Amen” mpo na ngai moko te. *Amen* elingi koloba “Ezala se bongo!”) Pe ezali bongo. Abraham azalaki na Sodoma te. Abraham azalaki epai na likolo pe libanda na Sodoma. Azali elili ya Lingomba ya molimo lelo.

⁶⁴ Lota azali elili ya lingomba oyo ebongisami, oyo ezali naino kuna na Sodoma. Tala malamumu, Biblia elobi ete: “Masumu ya Sodoma ezalaki konyokola molimo na ye ya sembo mokolo na mokolo.” Mpo na nini azangaki mpiko oyo ekoki mpo na kotelemela yango makasi? Lelo oyo bato malamumu bazali mingi oyo bafandi na lingomba, bazali kotala pe komona basi balati kupe pe mibali kosala makambo ya boye, bato na bango bazali kokende kobeta lisano ya golf na mokolo ya lomingu, na baféti ya bapíkiníki, pe kobeta mai pe makambo mosusu, na esika ya kokende na ndakonzambe. Bazali kofanda na ndako na mpokwa ya mokolo ya misato, kotala tévé, na esika ya kokende na ndakonzambe. Bazali na mposa ya koloba likambo mpo na yango, kasi etonga na bakambi ekoki kobwaka bango libanda. Likambo nini? Lota ye wana lisusu, azali kotala libanda na lininisa na ye pe komona masumu, kasi azali kobanga koloba ete lisumu ezali “Lisumu”!

⁶⁵ Abraham azalaki kati na potopoto na bango te, azalaki libanda na yango. Azalaki elili ya Lingomba ya molimo. Sikawa botala malamumu oyo esalemaki mpenza na ntango na suka, kaka liboso ete móto ekita. Pe bango bazalaki bato na Mabota. Epesamaki lokola elili ya móto kokweya likolo na mokili na bato na Mabota lelo, ntango bokonzi nyonso ekobukana pe ekotumbama. “Likolo ekozika,” Yawe alobi bongo, “pe ekozika mpo na móto makasi.” Oyo wana ezalaki elilingi na yango.

66 Sikawa tika totalisa bango. Abraham ye oyo, asili kobima libanda, azalaki na Sodoma te, azalaki libanda na Sodoma. Lota azalaki naino na Sodoma.

67 Likambo ya kokamwa, na ntongo moko ya moi makasi, esengelaki kozala pene na ngonga ya zomi na moko, amonaki mibali misato koya, bato lokola bato nyonso, bazalaki kotambola na balabala, na nzela. Abraham afandaki na nse na nzete, mpo na komipemisa. Autaki kotambola, mbala mosusu elongo na bibwele na ntongo wana, autaki kozonga na ndako pene na midi. Pe amonaki mibali misato koya. Pe likambo moko ezalaki na ntina na bato yango, oyo ezalaki kobenda bokebi. Ólalá!

68 Likambo moko ezalaka ntango nyonso na ntina na Nzambe, ntango Eyaka katikati na bato, Ebendaka bokebi. Bayebaka Yango. Eloko moko eyebisaka bango, botatolami moko ezali wana.

69 Abraham akendeki mbangu, pe alobaki: “Nkolo na ngai, belema pe tika ete natoka mwa mai, naluka yango pe nasukola Yo makolo, pe napesa Yo ndambo na lipa, bongo Okoka kokoba mobembo na Yo.” Boye akendeki pembeni. Akendeki mbangu kati na lopango ya bibwele, akamataki mwana na ngombe pe abomaki yango, atindaki mosali moko ete abongisa yango. Akotaki kati na hema, kuna na nse, pe atindaki Sara ete apota mwa fufu, alamba mwa, to mwa fufu, alamba mwa mapa, pe alamba mikate na lituka. Abimaki na yango na libanda pe atielaki Ye. Wana efandaki ye naino kuna, azalaki kolia, babandaki komona ete Mobali oyo azalaki kouwela kotala na ngambo ya Sodoma. Pe alobaki . . .

70 Bomikanisela, mibale kati na bango bakitaki kuna na Sodoma. Mibale bakendeki na Sodoma. Nasengi bino, bozanga likambo oyo te. Nazali kozonga na oyo Yesu alobaki. Mibale kati na bango bakendeki na Sodoma mpo na kobimisa Lota pe baoyo babelemaki kuna ete babimisama. Pe mibale oyo bakitaki kuna, bakendeki kuna pe bateyaki. (Pe Moko mpamba atikalaki na nsima epai na Abraham. Botala malamumu elembo oyo Ye asalaki.) Bazuaki elembo moko kuna, ezalaki . . . bato na Sodoma babomamaki miso. Koteya Nsango Malamumu ekobomaka ntango nyonso miso ya mozangi-kondima. Pe botala malamumu nini esalaki yango.

71 Sikawa, Moko mpamba atikalaki na nsima pe asalaki elembo yango Liboso na Abraham.

72 Bongo, bosili komona, bakomi na makambo ya kala nyonso, bolanda na Makomi, bolanda na masolo ya kala, esalemi ata mbala moko te. Kati na bileko na lingomba epai wapi, moto moko akende kuna na mokili epai na mangomba ya nkombo, kuna na bibongiseli, naino moto moko te amonana liboso oyo nkombo na ye esuka lokola nkombo ya Abraham, na h-a-m. Kasi lelo bazwi moko, G-r-a-h-a-m. Ezali bongo. Azali kokende

kuna, kobenga bango ete babima. Na nzela na yango, azali kosala mosala moko ya kitoko. Graham, Billy Graham, mosali na Nzambe kuna katikati na bibongiseli, na bato ya politiki, pe bongo na bongo, azali kopanza yango.

⁷³ Mokolo wana, ntango balingaki ete akota na kowelana mpo ákóma Prezidá, aboyaki likambo yango na mbala moko. Nzambe, apambola ye mpo na yango. Zambi, mpo na bakompani oyo elambaka lotoko, mbele alingaki ata kolonga mikakatano ya liboso soko moke te. Bango balingaki kobebisa mifuku na mifuku ya ba-dollar, mpamba te alingaki kaka kotungisa bango, bakompani oyo ya makaya pe ya biloko mosusu ya ndenge wana. Bomoni, azali kuna lokola motindami na Nzambe epai na bato ya Sodoma. Ezali bongo mpenza.

⁷⁴ Kasi bomikanisela, Moko mpamba atikalaki kuna epai na likolo elongo na Abraham, Moto mosusu, bato mibale oyo kuna te, oyo bakitaki kuna lokola bapalanganisi Nsango Malamu ya mikolo oyo, bakendeki koteya kuna. Botala malamumu, Moko mpamba atikalaki kuna epai na likolo. Mibale bakitaki epai *kuna*, pe Moko mpamba atikalaki *awa* elongo na Abraham. Pe Oyo atikalaki elongo na Abraham apesaki ye elembo.

⁷⁵ Sikawa botala, nkombo na ye ezaláká “Abram” pe oyo ya mwasi na ye ezaláká “Saraï,” bobeke mokolo moko to mibale liboso na yango. Nzambe autaki kobimela ye pe koyebisa ye: “Nazali kobongola nkombo na yo sasaipi kolongwa na Abram kokóma Abraham.” (Bomoni, G-r-a-h-a-m ezali na nkoma motoba, ya bato.) Kasi A-b-r-a-h-a-m ezali na yango nsambo, nkoma nsambo; h-a-m, esuki na h-a-m.

⁷⁶ Sikawa, na likolo awa na Lingomba ya molimo, Moko mpamba azalaki wana epai na Abraham, pe botala malamumu oyo Alobaki. Alobaki: “Abraham,” (“Abram” te) “Abraham, wapi mwasi na yo” (“S-a-r-a-ï” te) “S-a-r-a? Wapi mwasi na yo Sara?”

⁷⁷ Boyoka oyo alobaki: “Azali kuna na hema nsima na Yo.”

⁷⁸ Pe Ye alobaki: “Nakoya kotala bino. Nazali koya kotala bino.” Bomoni likitana bomei wana, Moto moko wana, yengebene na elaka oyo Apesáká. Oyo wana ezalaki Nzambe! Alobaki: “Nakoya epai na bino.”

⁷⁹ Pe Sara, (na elobeli oyo biso nyonso tokoki kososola) asekaki na kati ya motema, ye moko, alobaki: “Ngai, mwasi mobange, na nkolo na ngai ya mibu nkama,” (ezalaki nde Abraham) “ye pe mobange, tosilá koleka ntango ya bomoi wana ntango tozalaki bilenge.” Alobaki: “Boye, tokoki lisusu koyoka mposa wana te, ngai nanuni, ye pe anuni.” Alobaki: “Tokoki koyoka yango te.” Pe alobaki: “Boni? Makambo oyo ekoki kosalema te!”

⁸⁰ Pe Mo—Mobali yango (Nzambe kati na nzoto na moto) alobaki: “Mpo na nini Sara aseki pe abeti ntembe, na kolobaka makambo oyo?” Kati na hema, na nsima na Ye.

⁸¹ Sikawa botala malam, soki oyo wana ezali mosala bobele moko oyo Yesu Klisto azalaki na yango te! Atambuisaki miso epai na bayoki pe ayebaki makanisi na bango. Ayebisaki Petelo nani ye azalaki pe nkombo ya tata na ye ezalaki nani. Ayebisaki pe Natanaele.

⁸² Ayebisaki mwasi oyo azalaki na liziba, ntango alobaki. . . Alobaki: “Kende kokamatela Ngai mai namela,” to “Pesa Ngai mai namela.”

⁸³ Alobaki: “Misie, ezali momeseno te mpo na Yo ya kosolola na. . . bino Bayuda kosolola na Basamalia. Bisu na bino toyokanaka te.”

⁸⁴ Alobaki: “Kasi soki oyebaki Nani oyo ozali kosolola na Ye, yo nde olingaki kosenga Ngai mai ya komela.” Lisolo yango ekobaki. Alobaki: “Kende kobenga mobali na yo pe yaka awa.”

Alobaki: “Nazali na mobali te.”

Alobaki: “Olobi malam, mpamba te osili kozala na mibali mitano.”

Alobaki: “Misie!”

⁸⁵ Botala bokeseni kati na ye na ba—na banganzambe ya mikolo wana, na lisanga wana oyo ezalaki kobika kati na mwa bongengi ya eleko oyo eleká. Balobaki: “Oyo ezali ya Zabolo!” Basengelaki kopesa eyano ata moko epai na lisanga na bango, mpamba te esengelaki basala yango.

⁸⁶ Kasi mwa mwasi oyo asalaki nini, Momboto oyo ebongisama liboso, oyo ezalaki kati na motema na ye. . . Asilaki koyina pe kolemba likambo yango, asilaki kotambola-tambola kosala kindumba na balabala. Kasi ntango amonaki Yango, alobaki: “Tata, namoni ete Ozali Mosakoli. Tozui ata mosakoli moko te kati na mibu nkama minei, pe bayebisaki biso ete ekoya Masiya, yango nde misala oyo Akosala.” Ólalá! Momboto yango, oyo efandaki kuna, ezwaki bomoi na pwasa. Mpo na nini? Yango ezalaki na ntina ya kolimbolama te.

⁸⁷ Yesu alobaki: “Ezali nde Ngai oyo Nazali kosolola na yo.” Yango ezalaki na ntina ya kolimbolama te. Asalaki likamwisi pe atitolaki ete Ye nde azalaki Masiya yango, amen, pe apesaki bobele litatoli mpenza oyo Nzambe alakaki. (“Yawe Nzambe na yo akotelemisa Mosakoli lokola ngai,” Mose nde alobaki bongo). Ezalaki nini? Kotatolama ya Makomi!

⁸⁸ Akimaki mbangu kino na engumba, pe alobaki: “Yaka komona Moto Oyo alobi na ngai makambo nyonso masali ngai. Soki oyo azali nde Klisto? Soki oyo nde Ye? Alobi na ngai oyo nasala.”

⁸⁹ Sikawa botala, Yesu, ezalaki nde Ye, kuna, kati na Moto wana oyo Apesaki mokongo na hema pe alobaki oyo Sara azalaki kokanisa kati na hema.

⁹⁰ Liloba na Nzambe elobi, na Baebele, mokapo ya 4, ete . . . Alobi boye: “Liloba na Nzambe ezali na nguya pe na mopótú koleka mipanga nyonso mipeli bipai mibale. Ezali kokata kino na matonga pe lilongo, ezali komeka makanisi pe mikano na motema.” Ezali nde Liloba! Pe mbala nyonso oyo mosakoli moko azalaki koya, azalaki koya na Liloba, pe azalaki Liloba mpo na eleko yango. Pe ezalaki ko nini? Moto oyo asakolaka pe oyo azali kososola makanisi oyo ezalaki kati na motema.

⁹¹ Esalemaki bongo na Yesu Klisto mpo ete Ye azalaki Litondi ya Liloba.

⁹² Pe Yesu alobaki: “Pelamoko na mikolo na Sodoma, ekozala lokola makambo oyo na mokolo na boyei ya Mwana na moto.” Molimo na Nzambe ekoya na mokili na lolenge ya bato, Nzambe amonisami polele na nzoto na moto (Amen! Bomoni yango?), pe akosala likambo yango moko oyo Nzambe, kati na nzoto na moto, asáláká na Sodoma. Bomikanisela, bazalaki kozela mwana na elaka. Pe, bobele nsima na yango, mwana yango na elaka ayaki. Yango nde ezalaki elembo na suka oyo Sodoma pe etonga ya Abraham bamonaki liboso ete mwana na elaka aya. Bososoli yango? Pe sikawa, Lingomba ya molimo ekomi na ngonga yango.

⁹³ Moto moko alobaki: “Ndeko Branham, olobi ete ‘oyo wana ezalaki Nzambe?’”

⁹⁴ Biblia elobi ete Ezalaki Nzambe! Yango ezalaki na ntina ya kolimbolama te. Azali Elohim. Abraham abengaki Ye Bongo. Motangi nyonso ya Biblia ayebi yango. *Elohim*, “Ye oyo na makoki nyonso.” Azalaki oyo na Liboso pe oyo na Suka; Ebandeli pe Suka. Elohim! Abraham abengaki Ye “Elohim.” Nzambe (na nkoma ya minene na lokota ya Baebele), Elohim; lokola kaka na ebandeli, “Nzambe,” Elohim.

⁹⁵ Ezalaki Elohim oyo amonisami polele na nzoto na moto, alati bilamba oyo ya bato, aliaki bilei oyo ya bato. Amen! Elembo moko kotalisa ete na mikolo na suka Nzambe akomonana lisusu katikati na libota na Ye na nzoto na moto! Amen! Yesu alobaki: “Misala mizali ngai kosala. Bokosala yango pe lokola. Pe pelamoko na mikolo na Sodoma, ekozala lokola makambo oyo na mokolo ekomonana Mwana na moto.” Amen! yango ezali na ntina ya kolimbolama te; ezali na bosenga ya komimonisa, tala oyo esengeli na yango. Amen. Bondimi yango?

Togumba mito na biso.

⁹⁶ Tata na biso na Likolo, na mpokwa oyo topesi Yo elaka na Yo ete Olobaki makambo oyo. Olobaki yango. Soki Yo te, moto mosusu akoki kopesa bomoi na Liloba na Yo te. Olobaki: “Tika pole ezala,” pe pole ezalaki. Moto moko te asengeli kolimbola yango, emonisamaki polele.

⁹⁷ Lokola ndenge tozongelaki maloba ya mosakoli Yisaya: “Mongondo akokumba zemi,” pe akumbaki zemi; ezali na

bosenga ya komonisama moko te; akumbaki zemi. Yango nde esalemaki.

⁹⁸ Olobaki, ntango Alingaki koya Asengelaki kobotama na Beteleme: “Uta na Beteleme, na Yuda. Oleki moke te kati na mikonzi na Yuda, ya Yisalaele? Kasi uta na yo, Motambwisi ya Libota na Ngai akobima.”

⁹⁹ Makambo oyo Alingaki kosala, maloba oyo Alingaki koganga na Ekulusu, ndenge balingaki kokweisa Ye, batobolaki makaka na Ye pe maboko na Ye; “Azokisami mpo na masumu na biso, atutami mpo na mabe na biso; etumbu oyo eyeiseli biso kimia, likolo na Ye; pe na mapipi na Ye, biso tobikisami.”

¹⁰⁰ Ndenge pe Dawidi alobaki: “Nakotika molimo na Ye na esika na bakufi te; Nakotika Mobulami na Ngai komona kopola te.” Bongo na mokolo na misato, liboso ete ngonga ntuku nsambo na mibale ekoka mpo nzoto na Ye epola, Liloba na Nzambe elobaki: “Akosekwa.” (Balobaki ete bayibaki nzoto na Ye; bazali kondima yango kino lelo.) Kasi biso, Nkolo, tondimi Liloba na Yo! Emonisamaki polele. Yesu Klisto asekwaki pe Alobaki: “Nako . . . Tala, Nazali na bino elongo mikolo nyonso, kino suka na ekeke.”

¹⁰¹ Tondimi ete Ozali awa na mpokwa oyo. Tondimi ete Ozali mpenza bobele Yesu Klisto na mpokwa oyo, awa, ndenge Ozalaki kala. Kasi Ozali bobele koluka miso, maboko, makolo, monoko, milimo, bantzoto oyo Okoki kosalela mpo na komimonisa Yo moko. E Nzambe, bulisa biso na mpokwa oyo, ete tokoka komona Yesu Klisto oyo ya bomoi kobika katikati na biso. Tika ete Aya! Na nsima, ekokokisama, lokola nzala oyo ezalaki na ba-Grek oyo bayaki mokolo wana, pe balobaki: “Misie, tolingi komona Yesu.” Pe basukaki na komona Ye. Oo, esengo ya ndenge wana ntango bamonaki Ye!

¹⁰² E Nzambe, Ozali ndenge moko lelo. Pe Olakaki ete soki tokozala na nzala, tokomona Yo. “Nsima na mwa ntango moke, bamokili bakomona Ngai lisusu te,” (bazangi-kondima); “kasi bino bokomona Ngai, Zambi nakozala elongo na bino, pe kati na bino, kino na suka na ekeke.” Toyebi ete Ozali lolenge moko, lobi, lelo, pe libela.

¹⁰³ Nkolo, Maloba esili kolobama, esila kokomama, sikawa, tika ete ekokisama, mpo na Nkembo na Nzambe, mpo na kotalisa ete Abatelaka Liloba na Ye. Amen. Nzambe apambola bino.

¹⁰⁴ Nakobenga bato na molongo ya mabondeli. Nabanzi Billy alobaki ete akabolaki bakalati ya mabondeli, moko kino mokama, to eloko moko ya ndenge wana. Azali awa te sikasikawa. Ezali . . . Kalati na mabondeli oyo wapi ezali na nimeró . . . Moto moko atala na nsima ya . . . Eko—ekozala nimeró na—na nkoma (A, B, C, D, to . . .). Ezali nini, A? Malamu.

¹⁰⁵ Tozua A, nimeró ya liboso, ya mibale, ya misato, ya minei, ya mitano. Bobanda bobele kotelema boye. A, nimeró ya liboso,

nimeró ya mibale, nimeró ya misato, nimeró ya minei. Ya minei, namoni ye kotelema te. Kalati ya mabondeli nimeró ya minei. Moko, mibale, misato. Mabondeli. . . Ntango mosusu bakoki kotelema te. Soki bakoki te, moto nyonso atala na kalati ya moto oyo afandi pembeni na ye, akoki kozala na kalati kasi akoki kotelema te. Nokinoki sikawa. Yango wana, ya minei. Ya mitano, kalati ya mabondeli nimeró ya mitano. Ya motoba, ya nsambo, ya mwambe, ya libwa, ya zomi, ya zomi na moko, ya zomi na mibale. Bobanda bobele kopusana sikawa epai boye ntango oyo banimeró na bino ezali kobengama. Nimeró ya liboso, ya mibale, ya misato, boyaka na molongo epai boye. Kalati ya mabondeli nimeró ya liboso, ya mibale, ya misato, ya minei, ya mitano, ya motoba, ya nsambo, ya mwambe, ya libwa, ya zomi, ya zomi na moko, botelema na bisika na bino. Zomi na moko, zomi na mibale, zomi na misato, zomi na minei, zomi na mitano, zomi na motoba, zomi na nsambo, zomi na mwambe, zomi na libwa, ntuku mibale, ntuku mibale na moko, ntuku mibale na mibale, ntuku mibale na misato, ntuku mibale na minei, ntuku mibale na mitano. Moto moko azali oyo akoki te ko. . .

106 Namoni elenge mobali moko na kiti ya bibosono kuna na suka. Mwana, soki nimeró na yo ebengami, pe—pe soki okoki kokóma te. . . Boye, tombola bobele loboko, tokoluka ndenge nini ókóma awa. Bomoni?

107 Bato boni awa na kati bazali na kalati ya mabondeli te kasi nde bozali na bokono? Botombola maboko, bipai nyonso bozali. Baoyo bazali awa, ezali bongo, botombola maboko. Bondimi? Na ntango oyo bazali kotia bango esika moko, bondimi Yango, ete Azali motindo moko lobi pe libela na libela? Bato boni? Botala malamau bino batei oyo; bandeko, Likomi elobi lelo te ete Azali Nganganzambe Mokonzi oyo akoki koyoka mpasi na bolembu na biso? Boye te? Boni bandimi yango, botombola maboko? Azali Nganganzambe Mokonzi oyo akoki koyoka mpasi na bolembu na biso.

108 Lisusu soki Biblia elobi: “Azali motindo moko lobi pe libela na libela,” Boni bandimi yango? Na bongo Akosala ndenge nini lelo? Akosengela kosala ndenge Asalaki lobi. Boye te? Azali wapi na mpokwa oyo? Afandi na loboko ya mobali ya Oyo-na-nkembo na kobangisa, nzoto na Ye; Molimo Mosantu azali awa na ndako oyo, mpo na kotalisa Ye.

109 Botala malamau, sikawa botala. Nini esalemaki kuna mokolo moko ntango moto moko, mwasi moko asimbaki monkoto na Ye? Azalaki na kalati ya mabondeli te, tokoloba, kasi asimbaki monkoto na Ye. Pe ntango asimbaki monkoto na Ye, Yesu abalukaki pe alobaki: “Nani asimbi Ngai?”

110 Petelo apamelaki Ye, pe alobaki: “Tala, Nkolo, yango ezali koyokana lokola motuna mpenza na mayele te. Tala, bato nyonso

bazali komeka kosimba Yo. Mpo na nini koloba: ‘Nani asimbi Ngai?’”

111 Alobaki: “Kasi Nayoki ete nzoto na Ngai elembi.” Boni bayebi yango? *Nguya*, oyo elingi koloba “makasi,” ebimaki kati na Ye. Nzoto na Ngai elembi, moto moko asimbi Ngai na esimbeli moko ya ndenge mosusu.” Abalukaki pe atalaki epai na bayoki kino Ayebaki nzela nini kondima yango eutaki.

112 Bato nyonso bazalaki kozinga Ye na maboko na bango: “Ee Labi, tondimeli Yo,” pe nyonso wana.

113 Kasi moto moko andimaki Yango mpenza. Pe asimbaki monkoto na Ye pe andimaki ete kobikisama, mpamba te azalaki koloba kati na motema na ye ete soki akokoka kosala bongo, yango elingaki kosalema.

114 Abalukaki pe atalaki epai na bayoki kino Amonaki ye, pe Alobaki. . . Ayebisaki ye ete litanga na ye ya makila ekatanaki pe ete abikisamaki. Ezali bongo? Sikawa, Asalaki nde ndenge wana, na kati na ebele na bayoki.

115 Sikawa, nazali kotatola ete Akufi te, Azali na bomoi lelo bobele ndenge mpenza Azalaki kalakala. Pe Biblia elobi, Yesu alobaki, Ye moko mpenza: “Pelamoko na mikolo na Sodoma, ekozala lokola makambo oyo na ntango na boyei na Mwana na moto.”

116 Sikawa botala, ata soki likabo oyo Nzambe azali kosalela epai boye ezali ya lolenge nini, esengeli pe ete mosusu ezala kuna, mpo na koyanola yango. Akotaki kati na engumba moko, Biblia elobi: “Makambo ezali mingi oyo Ye akokaki kosala te mpo na kozanga kondima na bango.” Ezali bongo? Ndenge moko lelo. Osengeli kondimela Ye. Osengeli bobele kondimela Ye. Yango nde nzela bobele moko mpo na yo kokoka.

117 Molongo ya mabondeli ebelemi? Sikawa, moto nyonso azala na limemia mpo na miníti pene na zomi. Nayebi te soki nakokóma kuna na suka, nazali na bato pene na ntuku-mibale na mitano to ntuku-misato oyo batelemi wana. Kasi sikawa, kati na molongo ya mabondeli, moto nyonso kati na bino kuna na molongo ya mabondeli oyo ayebi ete toyebani te, pe ete nayebi likambo na ye ata moko te, atombola loboko na ye. Moto nyonso kati na molongo ya mabondeli.

118 Sikawa kuna kati na bayoki, oyo ayebi ete nayebi likambo na ye moko te, atombola loboko na ye. Sikawa, sikawa, oyo nazali komeka koloba yango oyo, moninga, omoni. Sikawa, yango oyo. Batei oyo nyonso likolo awa na eteyelo. Pe Klisto nde apesaki elaka oyo. Bomoni, ekomama. Esengelaki kokokisama ntango nini? Na mikolo na suka, mpenza liboso na Boyei na Nkolo. Ezali bongo? Esengelaki kokokisama na ntango wana.

119 Bongo, yango nde Liloba oyo esakolamaki mpo na lelo. Pole na Luther te; pole na Wesley te; ata pe pole ya ba-Pantekotiste te.

Ezali oyo ekobi mobembo kino awa sikawa. Kasi, pole na Luther ezalaki mabe te, oyo ya ba-Methodiste ezali mabe te; ya ba-Batiste ezali mabe te, nyonso wana, ya ba-Pantekotiste, ezali mabe te. Bato ya lolenge nyonso bafandi awa na mpokwa oyo. Ezali te—ezali te—ezali likambo ya moto na moto te. Bongo soki . . .

¹²⁰ Okokoka soko moke te koyebisa Methodiste moko likambo na ntina na Luther, mpo ete ye andimaka kobulisama kasi Luther andimaka yango te. Bomoni?

¹²¹ Koyebisa moto na Pantekote soki moke te ete “kobulisama nde suka ya makambo,” mpo ete ye amoni bozongisami ya makabo. Akondima yango te. Te, azali na oyo eleki oyo wana. Bomoni? Pe yango nde eleko ya lingomba ya suka oyo tozali na yango, pe Biblia elobi ete bileko mosusu ya lingomba ekozala te.

¹²² Kasi esengeli ete bosangani moko ya bato ezala, bomoni, pe ekokisami. Sikawa, bobosana te, elembo ya suka. Boye biso pe tozali kozela mwana na elaka? Botombola maboko. Bondimi ete bozali Momboto na Abraham wana bozali kati na Klisto? Botombola maboko. Boye, Momboto na Abraham, boyamba elembo na bino! Ezali kuna na Babilona te, ezali kuna na mokili ya bibongiseli te. Ezali awa katikati na bino, baoyo bazali kati na potopoto oyo kuna te. Bondima yango!

¹²³ Mwasi moko ye oyo, nayebi ye ata moke te, azali penepene na mibu lokola ngai. Namona mwasi oyo ata mbala moko te na bomoi na ngai. Soki nakokaki kobikisa mwasi yango mbele nasali yango, soki azali kobela. Nayebi likambo moko te na ntina na ye. Bomonaki ye kotombola loboko eleki mwa miniti. Na—namona ye ata mbala moko te. Azali bobele mwasi moko oyo atelemi wana.

¹²⁴ Lelo oyo bayei awa pe bamemi liboke moko ya bakalati ya mabondeli, nasangisi-sangisi yango nyonso pe nakaboli yango na bato. Moko azwi nimeró ya liboso awa, pe nimeró ya zomi kuna na suka, nimeró ya zomi na mitano, nimeró ya nsambo, nimeró . . . kaka ndenge wana. Nyonso esangisamaka, mpenza liboso na bino, mokolo na mokolo. Pe ntango ezali kobengama, ezali kobengama bisika nyonso, kouta bipai na bipai. Bomoni? Pe, sikawa, osengeli te kozala na kalati ya mabondeli, fanda kaka wana pe ndima. Mpo na nini tokoki te. . .

¹²⁵ Lamuka na mpongi, na mpokwa oyo, yeba ngonga nini tozali kobika kati na yango. Bomoni? Sikawa, ekomi lisusu mpenza pene na suka, moninga. Mpenza pene na suka!

¹²⁶ Sikawa, soki Nzambe na Abraham asekwisaki Yesu Klisto uta na bakufi, pe soki Yesu alakaki ete na mikolo na suka bilembo yango moko oyo Abraham . . . oyo Mwanje (oyo azalaki Nzambe na nzoto na moto) asalaki liboso na Abraham, mpenza liboso ete mwana na elaka aya, Yesu alobaki ete likambo yango moko ekosalema lelo.

¹²⁷ Sikawa, tozali komona babombe atomike pe bibongiseli, pe nyonso wana, pe potopoto oyo bazali kati na yango. Tozali komona Billy Graham moko kuna, pe Oral Roberts, pe bato nyonso wana kuna, motindami ya ba-Pantekotiste pe motindami ya bibongiseli kuna, tozali komona nyonso wana kosalema, kokokisa elembo yango. Billy Graham, moto na likindo ya solosolo, oyo lingomba ebongisami ezali kondimela. Oral Roberts, na likabo ya solosolo ya kobikisa babeli, mpenzampenza oyo ba-Pantekotiste. . .

¹²⁸ Kasi boyoka, eloko mosusu ezali, oyo elakami epai na Momboto na Abraham. Bango wana, katikati na mangomba wana oyo ebongisami; eloko moko *kouta* na mangomba oyo ebongisami, esengeli kokokisama, kosangisa bato. Tobomba yango mpo na lobi na mpokwa.

¹²⁹ Botala malamumu, nayebi mwasi yango te. Nakopesa ye mokongo. Soki Nkolo Nzambe ayebisi mwasi yango likambo moko, ntango mosusu ezali—ezali likambo oyo etali ndako na ye, ntango mosusu ezali likambo oyo etali misolo, ntango mosusu ezali likambo oyo etali bokono; ngai nayebi te. Ye nde akoyeba soki ezali solo to te.

¹³⁰ Soki na mpokwa oyo Asali bobele ndenge moko na oyo Asaláká kalakala, bokondimela Nzambe oyo Yesu Klisto alakaki ete Akozala awa na mikolo na suka? Bato boni bandimi ete tozali kobika pelamoko na Sodoma, ntango mokili mobimba ekoti kati na ezaleli ya Sodoma? Boni kati na bino bandimi ete oyo nalobeli bino na mpokwa oyo ezali Solo? Bongo, bana pe Momboto na Abraham, bondimela Nzambe!

¹³¹ Bongo, mpo na kobimisa na makanisi na bino ete nazali komeka kolobela mwasi oyo likambo, wana ezali ngai kotala ye na elongi, to kobimisa makambo nyonso oyo etali botangi makanisi to nyonso oyo bolingi koyeba. Moto nyonso oyo ayebi makambo oyo etali botangi makanisi akokanisa malamumu koleka. Bomoni? Bomoni? Bosilá komona motangi na makanisi koteya Nsango Malamumu? Bosila komona moto oyo asololaka na milimo koteya Nsango Malamumu, kosala bilembo pe makamwisi, kosakola ete Yesu Klisto azali motindo moko? Te.

¹³² Bomoni, ezali bobele. . . Ezali makanisi na bato. Bomoni, bazali bakufi miso. Bondimi ete bakoki kozala bakufi miso? Biblia elobi ete bakozala bongo. Ezali bongo? “Bato na nko, bato bavimbi na lolendo, baoyo bakolingaka malamumu na bango mpenza koleka bolingo epai na Nzambe, bazangi boboto, batongi, batomboki, bayini na malamumu, bato bazali na lolenge na kosambela nde bazali koangana nguya na yango.”

¹³³ Yesu alobaki te, kati na Matayo 24: 24 ete “Milimo yango mibale, na mikolo na suka ekokóma pene na kopengwisa baponami mpenza soki nde ekokoka”? Kasi ekokoka te. Bazalaki

kati na makanisi na Nzambe na ebandeli, pe bazali eteni na Nzambe.

¹³⁴ Sikawa, Nzambe na Abraham, Isaka, pe Yakobo, tika ete eyebana na mpokwa oyo ete nazali koloba Solo na ntina na Yo. Ezali Yo, Nkolo. Kati na komikitisa, tika ete basali na Yo bazala na makoki ya kotia makanisi na bango pembeni, ete Okoka kosalela banzoto na biso mpo na Nkembo na Yo. Na Nkombo na Yesu, Mwana na Nzambe. Amen.

¹³⁵ Likabo ezali nini? Ezali te eloko oyo okokamata mpo na kopapa na yango pe kobongola. Te, te. Ezali ete oyeba ndenge nini komilongola na nzela ete Nzambe akoka kosalela yo. Likabo ezali bobele komilongola, bongo Nzambe asalela yango.

¹³⁶ Mwasi oyo azali nsima na ngai akokufa sikawa soki abikisami te. Mwasi oyo azali nsima na ngai bauti kobondela mpo na ye na moto mosusu, eumeli te. Azali na kanser. Kanser yango ezali na libele na ye pe lisusu na mipúlúlu na ye. Pe bautaki kobondela mpo na ye eumeli te, pe azali komeka koyamba yango na nzela na kondima ete abikisami. Ezali YANGO ELOBI NKOLO! Madame, ezali ya solo? [Mwasi yango alobi: “Iyo, na ntembe te ezali ya solo.”—N.D.E.] Soki ezali bongo, pepa—pepa loboko na yo epai na bayoki. Nzambe na Abraham azali ntango nyonso na bomoi! Malamu, koba kondima oyo ondimi pe okoyoka nzoto malamumu. Amen.

Bondimi? Bolobi: “Bongo bayoki?”

¹³⁷ Mwasi oyo, oyo afandi awa, oyo a . . . na suka ya molongo, mwasi ya mibale kuna. Ntango nabaluki namoni eloko moko kaka wana, eloko moko ezingi loboko na ye, makila ya nzoto kotambola noki-noki. Azali na bokono ya ipertasió. Madame, ezali bongo? Tombola loboko. Soki ondimi, tasió na yo ekokita. Nzambe na Abraham azali naino kosala. Azali mpenza oyo yango ezalaki, Liloba na Nzambe mpo na lelo!

¹³⁸ Mbote! Ondimi sikawa? Zala na kondima epai na Nzambe! Amonanaki lokola mwana. Nzambe nde ayebi motema na yo, elenge mwasi, ngai nayebi te. Ondimi ete Nzambe azali na makoki ya komonisa ngai nini ezali kotambola te? Okondima Ye soki nasali yango? Ezali mpo na yo te, ezali mpo na moto mosusu, ezali nde ndeko na yo ya mobali. Azali kobela makasi pe azali na engumba moko oyo ezali awa epai na likolo, na Tulare. Azali na lopitalo, pe azali na kanser ya makila, pe minganga balobaki ete akokufa. Elikia ezali ata moke te. Ezali bongo. Ondimi? [Mwasi yango, wana ezali ye kolela, alobi: “Iyo.”—N.D.E.] Malamumu. Osimbi nini na loboko na yo? Kamata yango pe tia yango likolo na ye. Pe kotia ntembe na yango te. Ndima! Amen.

¹³⁹ Ondimi? Namona naino mwasi oyo na bomoi na ngai te. Kasi Nzambe azali kaka Nzambe! Sikawa yebisa ngai, moto akoki kosala yango? Na motindo moto asalema, akoki kosala yango te. Ezali nde Nzambe oyo Yesu Klisto alakaki ete Akozala awa na

mikolo na suka pe ete Akomitatola Ye moko (mpenza liboso na Momboto na Abraham) pelamoko na mikolo na Sodoma.

¹⁴⁰ Awa sikawa, nayebi mwasi oyo te, ngai na yo toyebani te, na bomoi na biso, nabanzi ezali mbala ya liboso ete tokutana. Ondimi ete nazali mosali na Ye? Ondimi ete oyo ezali Liloba? Pe oyebe ete soki. . . Liloba oyo ezali ntango nyonso komeka makanisi pe mikano na motema. Ezali bongo? Liloba ezali pe Mobikisi na nzoto, lisusu soki okoki kondima Yango. Ondimi? Elili moko pe ya moindo ezipi yo. Ezali kanser. Pe ondimi ete Nzambe akoki koyebisa ngai epai wapi kanser yango ezali? Ezali na misopo na yo na nse, ndenge monganga alobi. Ondimi sikawa ete okobikisama? Kende, pe kotia ntembe ata moke te, pe Nzambe akobikisa yo. Amen.

¹⁴¹ Bino nyonso, bondimi? Mpenza oyo Alakaki ete Akosala! Bozala na kondima epai na Nzambe, botia ntembe te.

¹⁴² Ngai na yo toyebani te. Nayebi yo te. Soki toyebani te, talisa yango na liyangani, tosimbana na maboko. Namona naino mwasi oyo te na bomoi na ngai.

¹⁴³ Bino kuna, bondimi? Bondimi ete ezali Yesu Klisto? Ezali nini? Ezali Liloba na Ye. Ntango bato oyo baboi Yango, bazali koboya moto te, bazali koboya nde Liloba. Ezali nde Liloba oyo ezalaki libanda, ezalaki kokoka kozonga lisusu na kati te.

¹⁴⁴ Sikawa, mwasi oyo nayebi ye te. Namona naino ye te na bomoi na ngai. Nzambe azali Mobikisi na nzoto. Mbala mosusu ezali na yango mpo na lobiko na nzoto te, ekoki kozala mpo na likambo mosusu, kasi soki Nzambe alimboleli ngai nini ezali kotungisa yo, okondima ngai? Likambo ya liboso olingi ete babondela mpo na yo ezali ete, litoi na yo ekufa. Litoi na yo moko, oyokaka na yango te. Ezali bongo. Ezali ya solo. Nsima na yango, ozali na momeseno moko, pe olingi kotika momeseno yango, ezali nde komela makaya. Tia mosapi sikawa na litoi na yo oyo ya malamumu, malamumu, na litoi na yo oyo ya malamumu. Malamumu. Sikawa ndima Nzambe pe koba mobembo na yo, pe tika. . . pe okomela lisusu makaya te soki ondimi. Kende, pe Nkolo apambola yo.

Bomoni nini esalemi. Azali ya solosolo, boye te?

¹⁴⁵ Nayebi yo te, ngai na yo toyebani te. Namona naino yo te na bomoi na ngai, kasi Nzambe ayebi yo. Soki Nzambe akoki koyebisa ngai likambo moko na ntina na yo, okondima?

¹⁴⁶ Bayoki nyonso bokondima? Bino kuna, moto moko ayebi mwasi oyo? Moto moko kati na bayoki ayebi mwasi oyo? Malamumu, yo nde oyebe soki oyo ezali solo to te. Oyo nde esengeli kokata likambo. Oyo nde esengeli kotalisa bosolo.

¹⁴⁷ Sikawa bokoki komona oyo esalemi kaka kati na mwa miniti oyo euti koleka. Bomoni? Ezali bobele. . . Nazali kotengatenga. Bomoni? Ezali bobele ete biloko nyonso ezali kokoma molili mpo

na ngai. Bomoni, Ezali kososola-. Bomoni, Ezali nde Molimo Mosantu. Ezali ngai te. Ezali nde Liloba oyo elakamaki mpo na lelo. Esalema lisusu te uta mikolo na bantoma, esalema lisusu ata mbala moko te. Kasi esika elobamaki: “Mpenza-mpenza liboso na boyei ya Mwana na moto. Pelamoko na mikolo na Lota, ekozala lokola makambo oyo na mokolo na boyei ya Mwana na moto.” Bazangi-kondima bandimaka yango te. Moto pe atii motema te ete bandima Yango. Kasi bandimi bandimaka Yango!

148 Sikawa, soki Molimo Mosantu amonisi oyo, boni bakondima na motema mobimba, bokoki kotombola maboko?

149 Ozali na mwa mbeba. Ozwaka likama na motuka, etangolaki mikuwa mosusu ya nkingo na yo. Mompiko na yo moko pe etangoaki. Ezali bongo, boye te? Ondimi? Okoyoka malamau. Nkolo asanzolama.

150 Ondimi ete Nzambe akobikisa bokono na mimpiko? Boye kende liboso pe yamba lobiko na yo.

151 Madame, yaka. Tala epai boye. Ondimi ete Nzambe akobikisa mpasi ya motema? Malamau, koba mobembo pe ndima, pe motema na yo ekokoma malamau.

152 Yaka awa. Ondimi ete Nzambe akoki kobikisa mokongo na yo, kopesa yo bokolongonu? Na bongo kende pe ndima yango.

Ndima bobele Nzambe, yango nde nyonso oyo osengeli kosala!

153 Madame, yaka. Ondimi ete Nzambe akoki kobikisa mpasi ya likundi? Kende kolia bilei na yo ya mpokwa, ndima na motema na yo mobimba.

154 Yaka. Ondimi ete Nzambe akoki kobikisa mingai ya mikuwa? Boye kende, ndima, pe sala . . . Pe Nzambe akopesa yo bokolongunu.

155 Malamau, yaka. Ondimi na motema na yo mobimba? Ondimi? Lisusu mingai na mikuwa. Ondimi ete Nzambe akoki kopesa yo bokolongunu? Kende, ndima Yango, loba: “Natondi Yo, Nkolo.”

Bino kuna, boni bandimi? Bondimi?

156 Mwasi oyo afandi awa, oyo alati monkoto ya motane, oyo atomboli loboko kaka awa, azali kobela bokono ya ipertasio. Ondimi ete Nzambe akoki kopesa yo bokolongonu? Ondimi? Malamau. Tia maboko na yo likolo na mwasi oyo wana pene na yo kuna, pe yebisa ye ete mongongo na ye ekobonga. Amen.

Yango wana. Amen, Ondimi? Zala na kondima!

157 Tala mobali moko afandi awa, azali na bokono ya botangi makila. Ondimi, misie, oyo afandi awa? Iyo, ozali na bokono ya botangi makila. Yo ondimi ete ekosila?

158 Mwasi oyo pene na yo azali pe na bokono ya botangi makila, azali pe na mpasi ya mokongo. Ondimi ete Nzambe akobikisa yo? Ondimi? Tombola loboko pe yamba yango. Ndima.

¹⁵⁹ Mwasi oyo pene na yo azali na mitungisi na makolo pe na loketo. Madame, ondimi ete yango ezali bongo? Ondimi ete okobikisama? Boye, tombola loboko, loba: “Nayambi yango.”

¹⁶⁰ Malamu, mwasi oyo pene na ye azali na bokono ya mikolobe. Ondimi ete Nzambe akobikisa bokono yango, yo elenge mwasi oyo olati matalatala? Tombola loboko, loba: “Nayambi yango.” Malamu, ndima yango.

¹⁶¹ Mwasi oyo pene na ye azali na mpasi na mimpíko. Madame, ondimi ete Nzambe akobikisa mpasi yango ya mimpíko? Malamu, tombola loboko, yamba yango.

¹⁶² Mwana mwasi oyo pene na ye azali na limeú. Ondimi ete Nzambe akosilisa limeú yango? Tombola loboko, yamba yango.

¹⁶³ Boni bandimi na motema mobimba? Boye botelema pe boyamba yango. Botelema Liboso na Nzambe na Abraham, na Isaka, pe na Yakobo.

¹⁶⁴ Na Nkombo na Nkolo Yesu Klisto, tika ete Molimo Mosantu akita kati na ndako oyo sikawa pe abikisa moto nyonso oyo azuami Liboso na Nzambe!



NZAMBE AZALI MOLIMBOLI NA YE MOKO LIN64-0205

(God Is His Own Interpreter)

Liteya oyo ya Ndeko William Marrion Branham, eteyamaki liboso na Ngelesa mokolo mwa mosala misato na mpokwa, mokolo mwa 5, sanza ya mibale, na mobu 1964, na Kern County Fairgrounds na Bakersfield, Californie, U.S.A., ekamatamaki uta na bande pe ekomamaki na mobimba na yango na Ngelesa. Ndimbola oyo ya Lingala ekomamaki pe ekabolamaki na Voice Of God Recordings.

LINGALA

©2006 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org